





五言古詩卷之四

唐詩品彙四

新寧高棟編

正宗二

李白上

唐丹陽進士殷璠云白性嗜酒志不拘檢  
 常林棲十數載故其為文章率皆縱逸然  
 自騷人以還鮮有此體調也○李易水序  
 畧云太白不讀非聖之書耻為鄭衛之作  
 故其多仙天之詞凡言多諷興自風騷之  
 後馳騁屈宋鞭撻揚馬千載獨步唯公一  
 人○劉全白墓記畧云性倜儻好縱橫街  
 善賦詩才調逸出往往與會屬詞恐古人  
 之善詩者亦不逮○宋南豐曾鞏後序畧  
 云白之詩連類引象義雖中於法度者寡  
 然其辭開麗雋偉殆騷人所不及近世所  
 未有也舊史稱白有逸才志氣宏放飄然



有超世之心子以為實錄○黃山谷云太白歌詩度越六代與漢魏樂府爭衡藥城遺言云太白詩過人其平生所享如浮花浪蕊如羅幃舒卷似有人開明月直入無心可猜不可及也○雪浪齋日記云太白詩源流出於鮑明遠如樂府多用白紵等語故曰俊逸而鮑參軍也○詩眼云建安詩得風雅騷人氣骨最為近古唯李杜得之太白罕有全篇多雅以鮑明遠體○歸來子云太白天才俊麗不可矩矱然要長於詩而文非其所能也○朱子語錄云太白詩如無法度乃從容於法度之中蓋聖於詩者○嚴滄浪云觀太白詩要識真太白處太白天才豪逸語多率然而成者學者於每篇中要識其安身立命處可也○又曰太白發語謂之開門見山○又曰李杜二公不當優劣子美沉鬱太白飄逸太白夢遊天姥吟蜀道南等篇子美不能道子美北征兵車行垂老別等作太白不能道作

後之論詩以李杜為準扶天子以令諸侯也○又曰少陵詩法如孫吳太白詩如李廣

古風三十二首

朱子云太白古風兩卷皆自陳子昂感遇中來亦有全用

其句處太白去子昂不遠其尊慕如此劉後村云太白古風與陳子昂感遇之作筆力相上下唐之詩人皆在下風

其一

大雅久不作吾衰竟誰陳王風委蔓草戰國多荆榛  
龍虎相啖食兵戈建狂秦正聲何微茫哀怨豈騷人  
揚馬激頽波開流蕩無垠廢興雖萬變憲章亦已淪  
自從建安來綺麗不足珍聖代復元古垂衣貴清真



群才屬休明乘運共躍鱗文質相炳煥衆星羅秋旻  
我志在刪述垂暉映千春希聖如有立絕筆於獲麟  
朱晦庵云李白詩不專是豪放如首篇大雅久不  
作多少和緩○劉後村云此古今詩人之斷按也  
春陵揚齊賢云唐興文變極矣掃魏晉之陋起騷  
人之廢太白蓋以自任矣覽其著述筆力翩翩如  
行雲流水出乎自然非思索而得豈欺我哉○章  
貢蕭士武云按本事詩話曰李白才逸氣高與陳  
子昂齊名先後合德其論詩云齊梁以來艷薄斯  
極沈休文又尚以聲律將復古道非我而誰觀此  
詩則太白之志可見斯其所  
以為有唐詩人之稱首者歟

其二

蟾蜍薄太清蝕此瑤臺月圓光虧中天金魄遂淪沒  
蟬竦入紫微大明夷朝暉浮雲隔兩曜萬象昏陰霏

蕭蕭長門宮昔是今已非桂蠹花不實蕭云是采廢  
王后制中語  
天霜下嚴威沈嘆終永夕感我涕沾衣揚云按唐書  
王皇后久無  
子而武妃有寵后不平顯詆之遂廢欲立武妃為  
后太白詩意似屬乎此○蕭云白意若曰夫婦君  
臣俱人之大倫也至密近者莫如夫婦而且不能  
保其終况臣子之踈遠乎此所以感嘆而涕零也

其三

秦皇掃六合虎視何雄哉飛劍決浮雲諸侯盡西來  
明斷自天啓大畧駕群才收兵鑄金人函谷正東開  
銘功會稽嶺騁望瑯琊臺刑徒七十萬起土驪山隈  
尚采不死藥茫然使心哀連弩射海魚長鯨正崔嵬  
額鼻象五岳揚波噴雲雷鬣蔽青天何由覩蓬萊



徐市載秦女樓船幾時迴但見三泉下金棺葬寒灰

蕭云白意若曰仙者自然無為而化秦皇之所為宜其卒為方士所欺而不免於死也後之為人君而好神仙者亦可以鑒矣

其四

鳳飛九千仞五章備彩珎啣書且虛歸空入周與秦  
橫絕歷四海所居未得隣吾營紫河車千載落風塵  
藥物秘海岳采鉛清溪濱時登大樓山舉首望仙真  
羽駕滅去影飈車絕迴輪尚恐丹液遲志願不及伸  
徒霜鏡中髮羞彼鶴上人棄李何處開此花非我春  
唯應清都境長與韓衆親

蕭云此篇遊仙詩太白自言其志云

其五

太白何蒼蒼星辰上森列去天二百里邈爾與世絕  
中有綠髮翁披雲卧松雪不咲亦不語冥棲在巖穴  
我來逢真人長跪問寶訣粲然啓玉齒授以鍊藥說  
銘骨傳其語竦身已電滅仰望不可及蒼然五情熱  
吾將營丹砂永與世人別

蕭云白少遇司馬承禎謂其有仙風道骨可與學仙此詩與前篇非泛然之作

其六

客有鶴上仙飛飛凌太清揚言碧雲裏自道安期名  
兩兩白玉童雙吹紫鸞笙去影忽不見回風送天聲



舉首遠望之飄然若流星頽飡金光草壽與天齊傾

蕭云此篇亦遊仙詩恐是贈荅之詞

其七

莊周夢蝴蝶蝴蝶為莊周一體更變易萬事良悠悠

乃知蓬萊水復作清淺流青門種瓜人舊日東陵侯

富貴固如此營營何所求劉須溪云語意音節滴可如此而止○蕭云此篇達

生者之辭也謂忽然為人化為異物忽為異物化而為人一體變易尚未能知悠悠萬事豈能盡知

乎况又乃能知系倉之變乎故侯種瓜富貴者曰如是也既燭破此理尚何所求而營營苟苟以勞

哉生

其八

齊有侗儻生魯連特高妙明月出海底一朝開光曜

却秦振英聲後世仰末照意輕千金贈顧向平原笑

吾亦淡蕩人拂衣可同調蕭云白平生豪邁貌視權

乎魯仲連之為人也

其九

黃河走東溟白日落西海逝川與流光飄忽不相待

春容捨我去秋髮已衰改人生非寒松年貌豈長在

吾當乘雲螭吸景駐光彩蕭云此篇欲學仙以離世其見趣又出乎流俗矣

其十

松栢本孤直難為菴李頽昭昭嚴子陵垂釣滄波間



身將客星隱心與白雲閑長楫萬乘君還歸富春山  
清風洒六合邈然不可攀使我長嘆息冥棲巖石間  
蕭云太白亦有高尚其事之意此詩有所慕而作也

其十一

君平既棄世世亦棄君平觀變窮大易探元化群生  
寂寞綴道論空簾閉幽情騶虞不虛來鸞鷲有時鳴  
安知天漢上白日懸高名海客去已久誰人測沉冥

蕭云此篇雖詠史詩其自負之意亦深矣與詠子陵意同

其十二

胡關饒風沙蕭索竟終古木落秋草黃登高望戎虜

荒城空大漠邊邑無遺堵白骨橫千霜嵯峨蔽榛莽  
借問誰凌虐天驕毒威武赫怒我聖皇勞師事鞞鼓  
陽和變殺氣發卒騷中土三十六萬人哀哀淚如雨  
且悲就行役安得營農圃不見征戍兒豈知關山苦  
李牧今不在邊人飼豺虎

蕭云此篇當為哥舒翰政石堡而作其旨微而顯歟

其十三

燕昭延郭隗遂築黃金臺劇辛方趙至鄒衍復齊來  
奈何青雲士棄我如塵埃珠玉買歌笑糟糠養賢才  
方知黃鶴舉千里獨徘徊

蕭云此篇豈白不為時貴所禮而作歟不然何其有

黃鶴千里之句吁讀其詩者百世之下猶有感慨



其十四

寶劍雙蛟龍雪花照芙蓉精光射天地雷騰不可衝  
一去別金匣飛沉失相從風胡滅已久所以潛其鋒  
吳水深萬丈楚山邈千里雌雄終不隔神物會當逢

劉云此篇似  
學鮑照而作

其十五

天津三月時千門闔與李朝為斷腸花暮逐東流水  
前水復後水古今相續流新人非舊人年年橋上游  
鷄鳴海色動謁帝羅公侯月落西山陽餘輝半城樓  
衣冠照雲日朝下散皇州鞍馬如飛龍黃金絡馬頭

行人皆辟易志氣橫高丘入門上高堂列鼎錯珍羞  
香風引趙舞清管隨齊謳七十紫鴛鴦双双戲庭幽  
行樂爭晝夜自言度千秋功成身不退自言多衍尤  
黃犬空嘆息綠珠成冢雉何如鴟夷子散髮掉扁舟

蕭云此篇嘆時貴寵者不知  
退安得無李斯石崇之禍乎


其十六

郢客吟白雪遺響飛青天徒勞歌此曲舉世誰為傳  
試為巴人唱和者乃數千吞聲嘆息空凄然

蕭云士負才而不遇能不讀  
其詩而為之吞聲嘆息也歟

其十七





原件短缺



秋露白如玉團團下庭綠我行忽見之寒阜悲歲促  
人生鳥過目胡乃自結束景公一何愚牛山淚相續  
物苦不知足得隴又望蜀人生若波瀾世路有屈曲  
三萬六千日夜夜當秉燭蕭云此篇言人功成當去  
幾百年之內唯及時行樂耳識者觀之豈不可笑  
歟蓋白之言不盡意意在其中非聖於詩者孰能  
與於此乎

其十八

世道日交喪澆風散淳源不採芳桂枝反棲惡木根  
所以菑李對吐花竟不言劉云十字不知何從出下  
辨其說謂出於成蹊又淺  
淺知言者也大運有興沒群動爭飛奔歸來廣成子去入

長號別嚴親日月慘光晶泣盡繼以血心摧兩無聲  
困獸當猛虎窮魚餌奔鯨千去不一回投軀豈全生  
如何舞干戚一使有苗平蕭云此篇為討雲南而敗  
嘆大臣不能如益禹之佐  
齊敷文德以來遠人致有覆軍殺將之耻其愛君  
憂國之意深矣言之者無罪聞之者足以戒悲夫

其二十三

抱玉入楚國見疑古所聞良寶終見棄徒勞三獻君  
直木忌先伐芳蘭哀自焚盈滿天所損沉冥道為群  
東海沉碧水西關乘紫雲魯連及柱史可以躡清芬  
蕭云此篇嘆士之不遇知己者曷若魯連  
柱史之高舉遠蹈與道為群以保其身也哉

其二十四



燕臣昔慟哭五月飛秋霜庶女號蒼天震風擊齊堂  
精誠有所感造化爲悲傷而我竟何辜遠身金殿傍  
浮雲蔽紫闥白日難回光群沙穢明珠衆草凌孤芳  
古來共嘆息流淚空沾裳蕭云此白被讒遭放黜而作哀而不傷怨而不誹

其二十五

孤蘭生幽園衆草共蕪沒雖照陽春輝復悲高秋月  
飛霜早浙瀝綠艷恐休歇若無清風吹香氣爲誰發

蕭云此亦太白自傷而托興也

其二十六

登高望四海天地何漫漫霜被群物秋風飄太荒寒

榮華東流水萬事皆波瀾白日掩徂輝浮雲無定端  
梧桐巢燕雀枳棘棲鴛鴦且復歸去來劔歌行路難

蕭云此篇蓋謂君子在下小人在上識時之士唯有歸去來而已

其二十七

鳳饑不啄粟所食唯琅玕焉能與群鷄刺戩爭一殮  
朝鳴崑丘樹夕飲砥柱湍歸飛海路遠獨宿天霜寒  
幸遇王子晉結交青雲端懷恩未得報感別空長嘆

蕭云此篇白自此之辭蓋謂帝裔踈遠賀知章薦之方蒙知遇懷恩未報而嘆息也

其二十八

周穆八荒意漢皇萬乘尊淫樂心不極雄豪安足論



西海宴王母北宮邀上元瑤水聞遺歌玉杯竟空言  
靈跡成蔓草徒悲千載魂蕭云此篇蓋有諷乎  
明皇好神仙之事耳

其二十九

八荒馳驚颺萬物盡凋落浮雲蔽頽陽洪波振大壑  
龍鳳脫網罟飄飄將安託去去乘白駒空山詠場藿

蕭云此篇謂遭世亂而白脫身羈囚  
無所依託唯存詠白駒以自遣耳

其三十

菴菴開東園含咲誇白日偶蒙東風榮生此艷陽質  
豈無佳人色但恐菴不實宛轉龍火飛零落早相失  
詎知南山松獨立日蕭瑟蕭云此篇謂士無實行偶  
然榮遇其寵衰則易於棄

捐熟若君子有特  
操而不致節哉

其三十一

越客採明珠提携出南隅清輝照海月美價傾皇都  
獻君君按劍懷寶空長吁魚目復相哂寸心增煩紆

蕭云此篇謂賢者不遇於世  
小人衣冠反得位而哂笑焉

其三十二

我到巫山渚尋古登陽臺天空彩雲滅地遠清風來  
神女去已久襄王安在哉荒淫竟淪替樵牧徒悲哀

蕭云此太白南遷  
過巫山懷古而作

擬古八首



其一

青天何歷歷明星如白石劉云自然好黃姑與織女相去

不盈尺銀河無鵲橋非時將安適閨人理紈素遊子

悲行役劉云不如行子夜中飯瓶冰知冬寒霜露欺遠客客似

落葉飛飄飄不言歸別後羅帶長愁寬去時衣乘月

託宵夢因之寄金徽蕭云此篇傷時行役無期男女不得遂其家室感時而悲者焉

其二

高樓入青天下有白玉堂明月看欲墮當窓懸清光

逢夜一美人羅衣沾秋霜含情弄柔瑟彈作陌上桑

絃聲何激烈風卷遶飛梁行人皆躑躅棲鳥去廻翔

但寫妾意苦莫辭此曲傷頤逢同心者飛作紫鴛鴦

蕭云此篇喻賢懷才抱藝不肯輕許諸人思得同心同德而附之

其三

今日風日好明日恐不如春風笑於人何乃愁自居

吹簫舞彩鳳酌醴鱠神魚千金買一醉取樂不求餘

達士遺天地東門有二疏愚夫同瓦石有才能卷舒

無事坐悲苦塊然涸轍鮒蕭云此篇謂達士而能與時卷舒者其太白之素志

歎

其四

運速天地閉胡風結飛霜百草死冬月六龍頽西荒



太白出東方彗星揚精光鴛鴦非越鳥何為眷南翔  
惟昔鷹將犬今為侯與王得水成蛟龍爭池奪鳳凰  
北斗不酌酒南箕空簸揚蕭云此篇似是諷永王璘  
不從知王不足與有為而  
作

其五

月色不可掃客愁不可道玉露生秋衣流螢飛百草  
日月終銷毀天地同枯槁蟪蛄啼青松安見此樹老  
金丹寧誤俗昧者難精討爾非千歲翁多恨去世早  
飲酒入玉壺藏身以為寶劉云其初未有此意肆言  
及此達之又達○蕭云此

篇是反古詩服食求神仙多為藥所  
誤蓋白之素志欲學神仙猶反騷云

其六

生者為過客死者為歸人天地一逆旅同悲萬古塵  
月兔空擣藥扶桑已成薪白骨寂無言青松豈知春  
前後更嘆息浮榮何足珍

其七

涉江弄秋水愛此荷花鮮攀荷弄其珠蕩漾不成圓  
佳期彩雲重欲贈隔遠天相思無由見悵望涼風前

蕭云此篇喻賢者慕君纔得位而害之者至已欲  
有所獻而為讒所間也辭微意顯可謂怨而不誹

其八

去去復去去辭君還憶君漢水既殊流楚山亦此分



人生難稱意豈得長為群越燕喜海日燕鴻思朝雲  
別久容華晚琅玕不能飯日落知天昏夢長覺道遠  
望夫登高山化石竟不返劉云極其愁思語意終健  
古詩唐詩之異以此而觀  
人亦以此他人不知太白者情事淺爾謂其詩十  
九婦人非知白者亦非知詩者○蕭云此篇其太  
白去國之時所作乎身在江海心居魏闕懷君憂  
國之意藹然見於言辭之表末四句意是嗟嘆之  
曰雖遭時昏亂隔絕遠方然愛君  
之心猶石之堅也辭嚴意婉悲夫

樂府二十二首

沐浴子

沐芳莫彈冠浴蘭莫振衣處世忌太潔至人貴歲輝  
滄浪有釣叟吾與爾同歸蕭云此篇全隳括漁父詞  
意其太白涉難後之辭乎

子夜吳歌

長安一片月萬戶擣衣聲秋風吹不盡總是玉關情  
何日平胡虜良人罷遠征

大堤曲

漢水臨襄陽花開大堤暖佳期大堤下淚向南雲滿  
春風復無情吹我夢魂散不見眼中人天長音信斷

塞下曲

烽火動沙漠連照甘泉雲漢皇按劍起還召李將軍  
兵氣天上合鼓聲隴底聞橫行負勇氣一戰淨妖氛

寄遠曲

首二



青樓何所在乃在碧雲中寶鏡掛秋水羅衣輕春風  
新粧坐落日悵望金屏空念此送短書願因雙飛鴻

又

妾在春陵東君居漢江岳一日望卷光往來成白道

一作日日采藤一為雲雨別此地生秋草秋草秋蛾

燕上山成白道飛相思愁落暉何時一相見滅燭解羅衣

秋浦歌

秋浦長似秋蕭條使人愁客愁不可渡行上東大樓  
正西望長安下見江水流寄言向江水汝意憶儂不  
逢傳一掬淚為我達揚州

秦女卷衣

天子居未央妾侍卷衣裳顧無紫宮寵敢拂黃金牀  
水至亦不去熊來尚可當微身奉日月飄若螢之光  
願君采葑菲無以下體妨

邯鄲才人嫁為廝養卒婦

妾本崇臺女揚蛾入丹闕自倚顏如花寧知有彫歇  
一辭玉階下去若朝雲沒每憶邯鄲城深宮夢秋月  
君王不可見惆悵至明發

繫心於君亦得離騷之遺意歟

塞上曲



大漢無中策匈奴犯渭橋五原秋草綠胡馬一何驕  
命將征西極橫行陰山側燕支落漢家婦女無顏色  
轉戰渡黃河休兵樂事多蕭條清萬里瀚海寂無波

蕭云此詩為李清伐突厥擒頡利斥池北至  
太漢故太白美頌一時勳德借漢以為喻

### 關山月

明月出天山蒼茫雲海間長風幾萬里吹度玉門關  
漢下白登道胡窺青海灣由來征戰地不見有人還

劉云偶然玉門關一語繼  
以白登清海跋涉甚長

戍客望邊邑思歸多苦顏高

樓當此夜嘆息未應閑

呂氏云氣雄一世學者  
熟味之自然不淺矣

### 獨不見

白馬誰家子黃龍邊塞兒天山三丈雪豈是遠行時  
春重忽秋草莎鷄鳴西池風摧寒撥響月入霜闥悲  
憶與君別年種菴齊蛾眉掩今百餘尺蒼落成枯枝  
終然獨不見流淚空自知

### 短歌行

白日何短短百年苦易滿蒼穹浩茫茫萬劫太極長  
麻姑垂兩鬢一半已成霜天公見玉女大笑億千場  
吾欲攬六龍迴車掛扶桑北斗酌美酒勸龍各一觴  
富貴非所願與人駐顏色

蕭云此辭雖擬古樂府然  
其辭意則出於騷肆為惟

誕以寄  
興矣



妾薄命

漢帝寵阿嬌貯之黃金屋咳唾落九天隨風生珠玉  
寵極愛還歇妬深情却踈長門一步地不肯暫迴車  
劉人云似雨落不上天水覆難再收君情與妾意各自  
東西流昔日芙蓉花今成斷根草以色事他人能得  
幾時好劉云興盡語盡○蕭云此篇亦謂武  
惠妃奪寵而作辭意悽斷令人感嘆

古朗月行

小時不識月呼作白玉盤又疑瑤臺鏡飛在白雲端  
仙人垂兩足桂樹作團團白兔搗藥成問言誰與餐  
蟾蜍蝕圓影大明夜已殘拜昔落九烏天人清且安

陰精此淪惑去去不足觀憂來其如何悽愴摧心肝

蕭云此篇為貴妃淫亂而作也忠憤之意溢於詞外

上之回

三十六離宮樓臺與天通閣道步行月美人愁煙空  
恩踈寵不及奄李傷春風淫樂意何極金輿向回中  
萬乘出黃道千旗揚彩虹前軍細柳北後騎甘泉東  
豈問渭川老寧邀棄野童但慕瑤池宴歸來樂未窮

蕭云此篇言秦皇漢武之幸回中者不過溺志於神仙而已其諷諫明皇之意歟

怨歌行

十五入漢宮卷顏笑春紅君王選玉色侍寢金屏中



薦枕嬌夕月卷衣戀春風寧知趙飛燕奪寵恨無窮  
沈憂能傷人綠髮成霜蓬一朝不得意世事徒為空  
鷓鴣換美酒舞衣罷彫龍寒苦不忍言為君奏絲桐  
腸斷絃亦絕悲心夜忡忡蕭云此篇雖宮怨之辭然寄興深遠然而不諱

陌上桑

美女渭橋東春還事蠶作五馬如飛龍青絲結金絡  
不知誰家子調笑來相謔妾本秦羅敷玉顏豔名都  
綠條映素手採桑向城隅使君且不顧况復論秋胡  
寒將愛碧草鳴鳳棲青梧託心自有處但恠傍人愚  
徒令白日暮高駕空踟躕蕭云此篇言用世之士各有所從

白馬篇

龍馬花雪白金鞍五陵豪秋霜切玉劍落日明珠袍  
鬪鷄事萬乘軒蓋一何高弓摧南山虎手接太行猱  
酒後競風采三杯弄寶刀殺人如剪草劇孟同遊遨  
發憤去函谷從軍向臨洮叱咤萬戰場匈奴盡奔逃  
歸來使酒氣未肯拜蕭曹羞入原憲室荒淫隱蓬蒿

蕭云寓貶於褒寄揚於抑深得國風之旨

使客行

趙客縵胡纓吳鉤霜雪明銀鞍照白馬颯沓如流星  
十步殺一人千里不留行事了拂衣去深藏身與名



閑過信陵飲脫劍膝前橫將炙啖朱亥持觴勸侯嬴  
三杯吐然諾五嶽倒為輕眼蒼耳熱後意氣素霓生  
救趙揮金槌邯鄲先震驚千秋二壯士烜赫大梁城  
縱使俠骨香不慙世上英誰能書閣下白首太玄經

### 長干行

妾髮初覆額折巷門前劇郎騎竹馬來遶床弄青梅  
同居長干里兩小無嫌猜十四為君婦羞顏未嘗開  
低頭向暗壁千喚不一回十五始展眉願同塵與灰  
常存抱柱信豈上望夫臺十六君遠行瞿塘滪瀨堆  
五月不可觸猿聲天上哀門前遲行跡一一生綠苔

苔深不可掃落葉秋風早八月蝴蝶來雙飛西園草  
感此傷妾心坐愁紅顏老早晚下三巴預將書報家  
相迎不道遠直至長風沙

### 東武吟

好古咲流俗素聞賢達風方希佐明主長揖辭成功  
白日在高天迴光燭微躬恭承鳳凰詔歛起雲羅中  
清切紫霄迥優游丹禁通君王賜顏色聲價凌煙虹  
乘輿擁翠蓋扈從金城東寶馬麗絕景錦衣入新豐  
依巖望松雪對酒鳴絲桐因學揚子雲獻賦甘泉宮  
天書美片善清芬播無窮一朝去金馬飄落成飛蓬



賓客日踈散玉樽亦已空才力猶可倚不慙世上雄  
閑作東武吟曲盡情未終書此謝知己吾尋黃綺翁  
蕭云此篇太白放黜之後自述其志以別知己

五言古詩卷之四

唐詩品彙四

五言古詩卷之五

唐詩品彙五

新寧高棟編

正宗三

李白中

贈荅二十二首

贈盧司戶

秋色無遠近出門盡寒山白雲遙相識待我蒼梧間  
借問盧耽鶴西飛幾歲還劉須溪云起意極苦然不復為慘塞者

贈秋浦柳少府

秋浦舊蕭索公庭人吏稀因君樹菴李此地忽芳菲



搖筆望白雲開簾當翠微時來引山月縱酒酣清暉  
而我愛夫子淹留未忍歸

贈問丘處士

賢人有素業乃在沙塘陂竹影掃秋月荷衣落古池  
閑讀山海經散帙卧遙帷且耽田家樂遂曠林中期  
野酌勸芳酒園蔬烹露葵如能樹菴李為我結茅茨

贈瑕丘王少府

皎皎鸞鳳姿飄飄神仙氣梅生亦何事來作南昌尉  
清風佐鳴琴寂寞道為貴一見過所聞操持難與群  
毫揮魯邑訟目送瀛洲雲我隱屠釣下爾當玉石分

無由接高論空此仰清芬

嘲魯儒

魯叟談五經白髮死章句問以經濟策茫如墜煙霧  
足著遠遊履首戴方山中緩步從直道未行先起塵  
秦家丞相府不重褒衣人君非叔孫通與我本殊倫  
時事且未達歸耕汶水濱

贈常侍御

安石在東山無心濟天下一起振橫流功成復瀟灑  
大賢有卷舒季葉輕風雅在復屬何人君為知音者  
傳聞武安將氣振長平瓦燕趙期洗清周秦保宗社



登朝若有言為訪南遷賈蕭云意謂常若登朝有言不妨及之或者如賈生之

贈丹陽橫山周處士惟長

周子橫山隱開門臨城隅連峰入戶牖勝槩凌方壺  
時枉白紵詞放歌丹陽湖水色傲溟渤川光秀菰蒲  
當其得意時心與天壤俱閑雲隨舒卷安識身有無  
抱石耻獻玉沉泉咲探珠羽化如可作相携上清都

以詩代書答元丹丘

青鳥海上來今朝發何處口銜雲錦書與我忽飛去  
鳥去凌紫煙書留綺窓前開緘方一咲乃是故人傳

故人深相勗憶我勞心曲離居在咸陽三見秦草綠  
置書雙袂間引領不暫閑長望杳難見浮雲橫遠山

贈何七判官昌浩

有時忽惆悵匡坐至夜分劉云起意正同平明空嘯咤思欲

解世紛心隨長風去吹散萬里雲羞作濟南生九十

誦古文劉云自謂素志如此不然拂劍起沙漠收奇勳老死阡

陌間何因揚清芬夫子今管樂英才冠三軍終與同

出處豈將沮溺群

贈武十七諤并序

門人武諤深於義者也質木沉悍慕婁離之風潛



釣川海不數數於世間事聞中原作難西來訪余  
余愛子伯禽在魯許將冒胡兵以致之酒酣感激  
援筆而贈

馬如一疋練明日過吳門乃是要離客西來欲報恩  
笑開燕七首拂拭竟無言狄犬吠清洛天津成塞垣  
愛子隔東魯空悲斷腸猿林回棄白璧千里阻同奔  
君為我致之輕齋涉淮源精誠合天道不愧遠遊魂

蕭云輕齋涉淮源之辭也雖未保其必達亦盡吾  
父子之情而已萬一不幸竟其有知亦可無愧矣

贈裴司馬

翡翠黃金縷綉成歌舞衣若無雲間月誰可比光輝

秀色一如此多為衆女譏君恩移昔愛失寵秋風歸  
愁苦不窺隣泣上流黃機天寒素手冷夜長燭復微  
十日不滿匹鬢蓬亂如絲猶是可憐人容華世中稀  
向君發皓齒顧我莫相違

贈新平少年

韓信在淮陰少年相欺凌屈體若無骨壯心有所憑  
一遭龍顏君叱咤從此興千金谷漂母萬古共嗟稱  
而我竟何為寒苦坐相仍長風入短袂兩手如懷冰  
故人不相恤新友寧見矜摧殘檻中虎羈紲鞴上鷹  
何時騰風雲搏擊中所能



五月東魯行荅汶上君

五月梅始黃蠶凋桑柘空魯人重織作機杼鳴簾櫳  
顧余不及仕學劔來山東舉鞭放前途獲笑汶上翁  
下愚忽壯士未足論窮通我以一箭書能取聊城功  
終然不受賞羞與時人同西歸去直道落日昏陰虹  
此去爾勿言甘心如轉蓬

贈從兄襄陽少府皓

結髮未識事所友盡豪雄却秦不受賞擊晉寧為功  
一本此下有脫身白刃  
裏殺人紅塵中非也小節豈足言退歸春陵東  
歸來無產業生事如轉蓬一朝烏裘敝百鎰黃金空彈

劍徒激昂出門悲路窮吾兄青雲士然諾聞諸公所  
以陳片言片言貴情通棣華倘不接甘與秋草同

贈范金卿

君子枉青盼不知東走迷離家未幾月絡緯鳴中閨  
菴李君不言攀老碩成蹊那能吐芳信惠好相招携  
我有結緣玕久歲濁水泥時人棄此物乃與燕石齊  
撫拭欲贈之申眉路無梯遼東慙白豕楚客羞山鷄  
徒有獻芹心終流泣玉啼祗應自索漠留舌示山妻

讀諸葛武侯傳懷贈崔少府叔昆季

漢道昔云季群雄方戰爭霸圖各未立割據資豪英



赤伏起頽運卧龍得孔明當其南陽時隴畝躬自耕  
魚水三顧合風雲四海生武侯立岷蜀壯志吞咸京  
何人先見許但有崔州平余亦草間人頗懷拯物情  
晚途值子玉華髮同衰榮託意在經濟結交爲弟兄  
母令管與鮑千載獨知名

贈別舍人弟臺卿之江南

去國客行遠還山秋夢長梧桐落金井一葉飛銀床  
覺罷攬明鏡髮毛颯已霜良圖萎蔓草古貌成枯桑  
欲道心下事時人疑夜光因爲洞庭葉飄落之瀟湘  
令弟經濟士謫居我何傷潛虬隱尺水著論談興亡  
客遇王子喬口傳不死方入洞過天地登真朝玉皇  
吾將撫爾背揮手遂翱翔

早秋贈裴十七仲堪

遠海動風色吹愁落天涯南星變大火熱氣餘丹霞  
光景不可迴六龍轉天車荆人泣美玉魯叟悲匏瓜  
功業若夢裏撫琴發長嗟裴生信英邁崛起多才華  
歷抵海岱豪結交魯朱家復攜兩少妾艷色驚荷葩  
雙歌入青雲但惜白日斜窮溟出寶貝大澤饒龍蛇  
明主倘見收煙霄路非賒時命若不會歸應煉丹砂

贈崔司戶文昆季



雙珠出海底俱是連城珍明月兩特達餘輝傍照人  
英聲振名都高價動殊隣豈伊箕山故特以風期親  
惟昔不自媒擔簦西入秦攀龍九天上忝列歲星臣  
布衣侍丹墀密勿草絲綸才微惠渥重讒巧生緇磷  
一去已十年今來復盈旬清霜入曉鬢白露生衣巾  
側見綠水亭開門列華茵千金散義士四坐無凡賓  
欲折月中桂特為寒者薪路傍已竊咲天路將何因  
垂恩儻丘山報德有微身

酬崔五郎中

朔雲橫高天萬里起秋色壯士秋飛揚落日空嘆息

長嘯出原野凜然寒風生幸遭聖明時功業猶未成  
奈何懷良圖鬱悒獨愁坐杖策尋英豪立談乃知我  
崔公生民秀緬邈青雲姿制作參造化託諷含神祇  
每嶽尚可傾吐諾終不移是時霜飈寒逸興臨華池  
起舞拂長劍四坐皆揚眉因得窮懽情贈我以新詩  
又結汗漫期九垓遠相待舉身懃蓬壺濯足弄滄海  
從此凌倒景一去無時還朝遊明光宮暮入閭闔關  
但得長把袂何必嵩丘山

贈清漳明府姪聿

我李百萬葉柯條布中州天開青雲器日為蒼生憂



小邑且割鷄大刀佇烹牛雷聲動四境惠與清漳流  
絃歌詠唐堯脫落隱簪組心和得天真風俗猶太古  
牛羊散阡陌夜寢不扃戶問此何以然賢人宰吾土  
舉邑樹桃李垂陰亦流芬河堤繞綠水桑柘連青雲  
趙女不治容提籠書成群繰絲鳴機杼百里聲相聞  
訟息鳥下階高卧披道帙蒲鞭掛簷枝示耻無撲扶  
琴清月當戶人寂風入室長嘯無一言陶然上皇逸  
白玉壺冰水壺中允底清清光洞毫髮皎潔照群情  
趙北羨嘉政燕南播高名過客覽行謠因之誦德聲

經亂後將避地剡中留贈崔宣城

雙鵝飛洛陽五馬渡江徼何意上東門胡雛更長嘯  
中原走豺虎烈火焚宗廟太白晝經天頽陽掩餘照  
王城皆蕩覆世路成奔峭四海望長安顰眉寡西咲  
蒼生疑落葉白骨空相弔連兵似雪山破敵誰能料  
我垂比溟翼且學南山豹崔子賢主人歡娛每相召  
胡床紫玉笛却坐青雲叫楊巷滿州城置酒同臨眺  
忽思剡溪去水石遠清妙雪盡天地明風開湖山貌  
悶爲洛生詠醉發吳越調赤霞動金光日足森海嶠  
獨散萬古意閑垂一溪釣猿近天上啼人移月邊棹  
無以墨綬苦求丹砂要華髮長折腰將貽陶公誚



寄懷十六首

沙丘城下寄杜甫

我來竟何事高卧沙丘城城邊有古樹日夕連秋聲  
魯酒不可醉齊歌空復情思君若汶水浩蕩寄南征  
寄當途趙少府炎

晚登高樓望木落双江清寒山饒積翠秀色連州城  
目送楚雲盡心悲胡鴈聲相思不可見迴首故人情  
望終南山寄紫閣隱者

出門見南山引領意無限秀色難為名蒼翠日在眼  
有時白雲起天際自舒卷心中與之然託興每不淺

何當造幽人滅跡棲絕巘

獨酌清溪江石上寄權昭夷

我携一樽酒獨上江祖石自從天地開更長幾千尺  
舉杯向天咲天迴日西照永賴坐此石長垂嚴陵釣  
寄謝山中人可與爾同調

下潯陽城汎彭蠡寄黃判官

浪動濯嬰井潯陽江上風開帆入天鏡直向彭湖東  
落景轉踈雨晴雲散遠空名山發佳興清賞亦何窮  
春鏡掛遙月香爐滅彩虹相思俱對此舉目與君同  
宿白鷺洲寄揚江寧



朝別朱雀門暮棲白鷺洲波光搖海月星影入城樓  
望美金陵宰如思瓊樹憂徒令覓入夢翻覺夜成秋  
綠水解人意為余西北流因聲玉琴裏蕩漾寄君愁

夕霽杜陵登樓寄常繇

浮雲滅霽景萬物生秋容登樓送遠目伏檻觀群峰  
原野曠超緬關河紛雜重清輝映竹日翠色明雲松  
蹈海寄遐想還山迷舊蹤徒然迫晚暮未果諧心曾  
結桂空行立折麻恨莫從思君達永夜長樂聞踈鍾

月夜江行寄崔員外宗之

飄飄江風起蕭颯海樹秋登艫美清夜掛席移輕舟  
月隨碧山轉水合青天流杳如星河上但覺雲林幽  
歸路方浩浩徂川去悠悠徒悲蕙草歇復聽菱歌愁  
岸曲迷後浦沙明瞰前洲懷君不可見望遠增離憂

秋夜宿龍門香山寺奉寄王方城十七丈  
奉國營上人從弟幼成令問

朝發汝海東暮棲龍門中水寒夕波急木落秋山空  
望極九霄迥賞幽萬壑通目浩沙上月心清松下風  
玉斗橫網戶銀河耿蒼宮興在趣方逸歡餘情未終  
鳳駕憶王子虎溪懷遠公桂枝坐消歇棣華不復同  
流恨寄伊水盈盈焉可窮



北山獨酌寄常六

巢父將許由未聞買山隱道存跡自高何憚去人近  
紛吾下茲嶺地閑喧亦泯門橫群岫開水鑿衆泉引  
屏高而在雲竇深莫能準川光晝昏凝林氣夕棲緊  
於焉摘朱果兼得養玄牝坐月觀寶書拂霜弄瑤軫  
傾壺事幽酌顧影還獨盡念君風塵遊傲爾令自哂

江上寄元六林宗

霜落江始寒楓葉綠未脫客行悲清秋永路苦不達  
滄波眇川汜白日隱天末停棹依林巒驚猿相叫聒  
夜分河漢轉起視溟漲闊涼風何蕭蕭流水鳴活活

浦沙淨如洗海月明可掇蘭交空懷思瓊樹詎解渴  
勗哉滄洲心歲晚庶不奪幽賞頗自得興遠與誰豁

遊敬亭寄崔侍御

我家敬亭下輒繼謝公作相去數百年風期宛如昨  
登高素秋月下望青山郭俯視鴛鷺群飲啄自鳴躍  
夫子雖躡蹻瑤臺雪中鶴獨立窺浮雲其心在寥廓  
時來顧我咲一飯葵與藿世路如秋風相逢盡蕭索  
腰間玉貝劍意許無遺諾壯士不可輕相期在雲閣

安陸白兆山菴卷岳劉侍御縮

雲卧三十年好閑復愛仙蓬壺雖冥絕鸞鶴心悠然



歸來菴老出得甜雲窓眠對嶺人共語飲譚猿相連  
時昇翠微上邈若羅浮巔兩岑抱東壑一嶂橫西天  
樹雜日易隱崔傾月難圓芳草換野色飛蘿搖春烟  
入遠構石室選幽開山田獨此林下意杳無區中緣  
永離霜臺客千載方來旋

淮陰書懷寄王宗城

沙墩至梁苑二十五長亭大舶夾雙艣中流鵝鶴鳴  
雲天掃空碧川岳涵餘清飛鳧從西來適與佳興并  
眷言王喬鳥婉耍故人情復此親懿會而增交道榮  
沿洄且不定飄忽悵徂征暝投淮陰宿欣得漂母迎

斗酒烹黃鷄一餐感素誠予為楚壯士不是魯諸生  
有德必報之千金耻為輕緬書羈孤意遠寄棹歌聲

寄東魯二子

在金陵作

吳地桑葉綠吳蠶已三眠我家寄東魯誰種龜陰田  
春事已不及江行復茫然南風吹歸心飛墮酒樓前  
樓東一株桃枝葉拂青煙此樹我所種別來向三年  
桃今與樓齊我行尚未旋嬌女字平陽折卷倚桃邊  
折卷不見我淚下如流泉小兒名伯禽與姊亦齊眉  
雙行桃樹下撫背復誰憐念此失次第肝腸日憂煎  
裂素寫遠意因之汝陽川

范德機云天下喪亂骨肉離散此北征入門號啕以



下意也然彼合此離彼有哭其死此則憐其生彼兼時事此乃單詠要其憂思之正者也

聞丹丘子於城北營石門幽居中有高鳳遺跡僕離群遠懷亦有棲遁之志因叙舊以寄之

春華滄江月秋色碧海雲離居盈寒暑對此長思君  
思君楚水南望君淮山北夢魂雖飛來會面不可得  
疇昔在高陽同衾卧羲皇綠蘿咲簪綬丹壑賤岩廊  
晚途各分析乘興任所適僕在鴈門關君爲峨眉客  
心懸萬里外影帶兩鄉隔長劍復歸來相逢洛陽陌  
陌上何喧喧都令心意煩迷津覺踞失託勢隨風翻

以茲謝朝列長嘯歸故園恣閑逸求古散縹緲  
久欲入名山婚娶殊未畢人生信多故世事豈唯一  
念此憂如焚悵然若有失聞君卧石門宿昔契彌敦  
方從桂樹隱不羨桃花源高風起遐曠幽人跡復存  
松風清瑤瑟溪月湛芳樽安居偶佳賞丹心期此論  
送餞十六首

送張舍人之江東

張翰江東去正值秋風時天清一鴈遠海闊孤帆遲  
白日行欲暮滄波杳難期吳州如見月十里幸相思  
魯郡東石門送杜甫



醉別復幾日登臨徧池臺何時石門路重有金樽開  
秋波落泗水海色明徂徠飛蓬各自遠且盡手中杯

送裴十八圖南歸嵩山

君思潁水綠忽復歸嵩岑歸時莫洗耳爲我洗其心  
洗心得真情洗耳徒買名謝公終一起相與濟蒼生  
江夏送友人

雪點翠雲裘送君黃鶴樓黃鶴振玉羽西飛帝王州  
鳳無琅玕實何以贈遠遊徘徊相顧影淚下漢江流  
送郝昂謫巴中

瑤草寒不死移植滄江濱東風洒雨露會入天地春

予若洞庭葉隨波送逐臣思歸未可得書此謝情人

送楊山人歸嵩山

我有萬古宅嵩陽玉女峰長留一片月掛在東溪松

劉云超然天地間可以不死豈獨不經人道哉爾去掇仙草首蒲卷紫茸歲

晚或相訪青天騎白龍

金鄉送韋八之西京

客自長安來還歸長安去狂風吹我心西掛咸陽樹  
此情不可道此別何時遇望望不見君連山起煙霧

劉云同是瞻望不及之意能者自然

同王昌齡送族弟襄歸桂陽



秦地見碧草楚謠對清樽把酒爾何思鷓鴣啼南園  
余欲羅浮隱猶懷明主恩躊躇紫宮戀孤負滄洲言  
終然無心雲海上同飛翻相期乃不淺幽桂有芳根

康云此詩非一  
飯不忘君者乎

### 五松山送殷淑

秀色發江左風流奈若何仲文了不還獨立揚清波  
載酒五松山頽然白雲歌中天度落月萬里遙相過  
撫酒惜此月流光畏蹉跎明日別離去連峰鬱嵯峨

劉云此其淺易  
者非亦洒然

### 送崔氏昆季之金陵

放歌倚東樓行子期曉發秋風渡江來吹落山上月  
主人出美酒滅燭延清光二崔向金陵安得不盡觴  
小各弄歸棹雲帆卷輕霜扁舟敬亭下五兩先飄揚  
峽石入水卷碧流日更長思君無歲月西咲阻河梁

### 送韓準裴政孔巢父還山

獵客張兔置不能掛龍虎所以青雲人高歌在岩戶  
韓生信英彥裴子含清真孔侯復秀出俱與雲霞親  
峻節凌遠松同衾卧磐石芥冰嗽寒泉三子同二屐  
時時或乘興往往雲無心出山揖牧伯長嘯輕衣簪  
昨宵夢裏還云弄竹溪月今晨魯東門悵飲與君別



雲崖滑去馬羅逕迷歸人相思若煙草歷亂無冬春  
對雪奉餞任城六父秩滿歸京

龍虎謝鞭策鷓鴣不司晨君看海上鶴何似籠中鷄  
獨用天地心浮雲乃吾身雖將簪組狎若與煙霞親  
季父有英風白眉超常倫一官即夢寐脫屣歸西秦  
竇公敞華筵墨客盡來臻燕歌落胡鴈郢曲迴陽春  
征馬百度嘶遊車動行塵躊躇未忍去戀此四座人  
餞離駐高駕惜別空慙慙何時竹林下更與步兵鄰

送趙判官赴黔府中丞叔幕

廓落青雲心結交黃金盡富貴翻相忘令人忽自哂

躡躑髯毛斑盛時難再還巨源咄石生何事馬蹄間  
綠蘿長不厭却欲還東山君爲魯魯子拜揖高堂裏  
叔繼趙平原偏承明主恩風霜摧獨坐旌節鎮雄藩  
虎士秉金鉞蛾眉開玉樽才高幕下去義重林中言  
水宿五溪月霜啼三峽猿東風春草綠江上候歸軒

送魯郡劉長史遷弘農長史

魯國一杯水難容橫海鱗仲尼且不敬况乃尋常人  
白玉換斗粟黃金買尺薪閉門木葉下始覺秋非春  
聞君向西遷地即鼎湖隣寶鏡匣蒼蘚丹經埋素塵  
軒后上天時攀龍遺小臣及此留惠愛庶幾風化淳



魯縞如白煙五緜不成束臨行贈貧交一尺重山岳  
相國齊晏子贈行不及言託陰當樹李忘憂當樹萱  
他日見張祿綈袍懷舊恩

送楊少府赴選

大國置衡鏡準平天地心群賢無邪人朗鑑窮情深  
吾君詠南風袞冕彈鳴琴時泰多美士京國會纓簪  
山苗落磻底幽松出高岑夫子有盛才主司得球琳  
流水非鄭曲前行遇知音衣工剪綺綉一悞傷千金  
何惜刀尺餘不裁寒女衾我非彈冠者感別但開襟  
空谷無白駒賢人豈悲吟大道安棄物時來或招尋

爾見山吏部當應無陸沈

送薛九被讒去魯

宋人不辨玉魯賤東家丘我咲薛夫子胡為兩地遊  
黃金消衆口白璧竟難投梧桐生蒺藜綠竹乏佳實  
鳳凰宿誰家送與群鷄匹田家養老馬窮士歸其門  
蛾眉笑蹙者賓客去平原却斬美人首三千還駿奔  
毛公一挺劍趙楚兩相存孟嘗悅狡兔三窟賴馮諼  
信陵奪兵符爲用侯生言春申一何愚刎首爲李園  
賢哉四公子撫掌黃泉裏借問笑何人笑人不好士  
爾去且勿諠桃李竟何言沙丘無漂母誰肯飯王孫



番別八首

別魯頌

誰道泰山高下却魯連節誰云秦軍衆摧却魯連舌  
獨立天地間清風灑蘭雪劉云收得意象高迥自切事情夫子還個  
儻攻文繼前列錯落石上松無為秋霜折贈言鏤寶  
刀千歲庶不滅劉云古意選語

秋日魯郡堯祠亭上宴別杜補闕范侍御

我覺秋興逸誰云秋興悲山將落日去水與晴空宜  
魯酒白玉壺送行駐金羈歇安憇古木解帶挂橫枝  
歌鼓川上亭曲度神颯吹雲歸碧海夕鴈沒青天時

相失各萬里茫然空爾思

贈別王山人歸布山

王子析道論微言破秋毫還歸布山隱興入雲天高  
爾去安可遲瑤草恐衰歇我心亦懷歸屢夢松上月  
一作傲然遂獨往長嘯開巖扉林壑久已蕪石道生  
薔薇碩言弄笙鶴歲晚來相依

留別賈舍人至二首

秋風吹胡霜凋此簷下芳折芳怨歲晚離別悽以傷  
謬攀青瑣賢延我於此堂君為長沙客我獨之夜郎  
勸此一杯酒豈惟道路長割珠兩分贈寸心久不忘



何必兒女仁相看淚成行

太梁白雲起飄飄來南洲徘徊蒼梧野十見羅浮秋  
鰲挾山海傾四溟楊洪流意欲託孤鳳從之摩天遊  
鳳苦道踞難翱翔還昆丘不肯銜我去哀鳴慙不畱  
遠客謝主人明珠難暗投拂拭倚天劍西登岳陽樓  
長嘯萬里風掃清甯中憂誰念劉越石化為繞指柔

畱別金陵諸公

海水昔飛動三龍紛戰爭鍾山危波瀾傾側駭奔鯨  
黃旗一掃蕩割壤開吳京六代更霸王遺跡見都城  
至今秦淮間禮樂秀群英地扇鄒魯學詩騰顏謝名

五月金陵西祖余白下亭欲尋廬峰頂先遶漢水行  
香爐紫煙滅瀑布落太清若攀星辰去揮手緬含情

將遊衡岳過漢陽雙松亭畱別族弟浮屠

談皓

秦欺趙氏璧却入邯鄲宮本是楚家玉還來荆山中  
丹彩瀉滄溟清輝凌白虹青蠅一相點流落此時同  
卓絕道門秀談玄乃支公延蘿結幽居剪竹繞芳叢  
涼峯拂戶牖天籟鳴虛空憶我初來時蒲萄開景風  
今茲大火落秋葉黃梧桐水色憂沅湘長沙去何窮  
寄書訪衡嶠但與南飛鴻







